

# ***Ilanngussaqq D***



**Aningaasaqarnermut akileraartarnermullu  
ataatsimiititaliamut**

Ulloq: 25. marts 2015  
J.nr.: 01.31.11-00015

**AIS 2015-II pillugu Sanaartornermut ataatsimiititaliamut attuumassutilinnut  
Aningaasaqarnermut ataatsimiititaliap tusarniaanera**

Sanaartornermut ataatsimiititaliaq sinnerlugu AIS 2015 pillugu Sanaartornermut ataatsimiititaliamut attuumassutilinnut tusarniaanermit akissuteqarnissamut periarfissinneqaratta qujamassuttorujussuuvunga. Ataatsimiititaliat attuumassutilillit AIS pillugu Aningaasaqarnermut ataatsimiititaliap suliaqarnerani ilapittuuteqarnissamut taamaalillutik periarfissinneqarnerat pingaaruteqarlunilu tikilluaqqunarpoq, taamaaliomikkummi Nunatta Aningaasiviata aningaasaataanik Inatsisartut ataatsimut pingaarnersiunerat annertunerpaamik ersersinneqarsinnaammat. Sanaartornermut tunngasut AIS-imi initoqaat, taakkulu pisarnertut eqqumaffigineqartaqaat. Taamaattumik Sanaartornermut ataatsimiititaliap AIS-imut akissuteqarnissani pingaarteqaa.

Sanaartornermut ataatsimiititaliap oqaaseqaatit uku Aningaasaqarnermut ataatsimiititaliamut nassiuppai, Aningaasaqarnermut ataatsimiititaliap ulluni tulliuuttuni isumasiunermit apeqqutaanut Aningaasaqarnermut ataatsimiititaliap oqaaseqaatit tamakku ilanngussinnaaniassammagit, aamma/imal. AIS pillugu Sanaartornermut ataatsimiititaliap isumaliutissiissutissaannut ilanngunneqarsinnaaniassammata. Tamakku pillugit Sanaartornermut ataatsimiititaliap paasisaqarnissani qilanaaraa.

Sanaartornermut ataatsimiititaliap ataatsimut isigalugu AIS-imut annikitsuinnarnik oqaaseqaatissaqarpoq, Ataatsimiititaliammi iluarisimaarlugu paasivaa Aningaasaqarnermut ataatsimiititaliap AIS-15-II pillugu apeqqutimigut oqaaseqaatimigullu peqqissaarluinnarsimasoq, pisortallu sanaartugassaataannut tunngassuteqartutigit apeqqutinik naleqquttunik arlalissuarnik apeqquteqarsimasoq.

Sanaartornermut ataatsimiititaliap suliaasaqarfiit siunertaqarfiillu Aningaasaqarnermut ataatsimiititaliap Sanaartornermut ataatsimiititaliamut immikkut naleqqussorisimasai allakkatigit matumuuna aallaavigivai, Ataatsimiititalialli nalilernikuuaa suliaasaqarfiit 80-imiit 89-imut tamarmik Sanaartornermut ataatsimiititaliamut attuumassuteqartuusut, pisortanimmi sanaartortitsinerit tamarmik Sanaartornermut ataatsimiititaliap susassaqaqfigimmagit.

#### Konto pingaarneq 70.01.04 Sanaartornermi aqutsineq suliniutinullu aningaasartuutiit

Kontomi pingaarnermi aningaasaliissutit suliassaqaarfinni 80-89-imi oqaasertaliussanut nassuiaammut nr. 7-imut annertunerusumik attuumassuteqarput. Oqaasertaliussanut nassuiaammi takuneqarsinnaavoq, kontomi pingaarnermi tassani 2015-imi katillugit 7,8 mio. kr.-inik sanaartugassanik ataasiakkaanik suliassap akiata 2,5 procentia angullugu akiligassiinissamat Naalakkersuisut piginnaatinneqartut. Kontomi pingaarnermi tassani aningaasaliissutinut tunngavigisani takuneqarsinnaavoq, aningaasaliissutitigut ukiumoortumik sulisunut 17-inut, ukiumi ataatsimi 14-inik qaffariaataasumik pilersaarusiorderup ataatsimut isigalugu sukaterneqarnissaanut aningaasartuuteqartoqarsinnaasoq, aammali Test Labip ingerlanneqarneranut aningaasartuuteqartoqarsinnaasoq, Test Lab tassaavoq Namminersorlutik Oqartussat sanaartornermut immikkoortortaqarfiata sanatsisutut, Namminersorlutik Oqartussat siunnersuisartuisa minnerunngitsumillu Namminersorlutik Oqartussat sinnerlugit sanaartortussat ineriartortitsinariutik naapittarfiat toqqammaviallu. Ataatsimiititaliaq isumaqarluinnarpoq, taamaalioimikkut piviusut tunngavigalugit sanaartornermut tunngassuteqartutigut aqutsinermut tunngasunut aningaasanik nuussisoqartoq. Tamanna akimut ersittutut pissuseqanngilaq, aningaasallu tunniunneqartarneranni eqqortumik periutsitut taaneqartariaqarani.

Tamatuma saniatigut Ataatsimiititaliap paasivaa, kontomi pingaarnermi 9,83 mio. kr.-t isertitassatut missingersuutigineqartut, oqaasertaliussatulli nassuiaatit malillugit 7,8 mio. kr.-t taamaallaat annertunerpaamik akiligassiissutigineqarsinnaallutik. Isertitassat taama nikingassuteqarnerat nassuiarneqarsinnaanngitsutut pissuseqarpoq, itisilerneqartariaqarlunilu.

Sanaartornermut ataatsimiititaliap paasinninnera malillugu 2014-imut aningaasanut inatsimmut sanilliullugu sulisunik atuinerup malunnaatilimmik qaffakkiartornera, INI Byggeteknik A/S-imit siusinnerusukkut sulisuisa nuunneqarnerinik pissuteqarsinnaavoq. Ataatsimiititaliap paasinninnera malillugu, nuussineq – allaat illoqarfinmi pineqartumi pisartoq – immikkoortortap sulisuisa akornanni annertoqisumik taarseraannermik kinguneqarsimavoq. Ajornartorsiut allakkami uani kingusinnerusukkut Ataatsimiititaliap uterfigissavaa.

#### Konto pingaarneq 72.20.05 Ilaasunik angallassinermut tapiissutit

Sanaartornermut tunngasutigut kiffartuussinermut aningaasaliissutissanut atatillugu Naalakkersuisut isumaqatigiissuteqarsinnaanerani Aningaasaqarnermut ataatsimiititaliamit 2015-imi akuerineqartussaammat Sanaartornermut ataatsimiititaliap ajunngitsutut isigaa. Sanaartornermut ataatsimiititaliap qinnutigaa, tamanna pillugu aningaasaliissuteqarnissamat suliaq taamanikkornissaanut Naalakkersuisunit nassiuunneqarpat, Sanaartornermut ataatsimiititaliap Aningaasaqarnermut ataatsimiititaliamit tusarnianeqaqqaassasoq.

Sanaartornermut ataatsimiititaliaq tamatuma saniatigut isumaqarpoq, mittarfinnik nutaanik sanaartornissamat Naalakkersuisut pilersaarutaannut angallassinermi kiffartuussinermut isumaqatigiissutilliasat ataqatigiissinnissaat aamma eqqarsaatigineqartariaqartoq. Tassunga atatillugu angallannermut tunngasutigut Sanaartornermut ataatsimiititaliap aalajangiiffigisassatut siunnersuutai marlut siusinnerusukkut saqqummiussimasai Sanaartornermut ataatsimiititaliap malugeqqussavai. Sanaartornermut ataatsimiititaliap

maanna atuuttup aalajangiiffigisassatut siunnersuutit taakku marlut isummerfigisimangilai, ataatsimulli isigalugu isumaqarluni, siunnersuutinut marluusunut tunuliaqutaasut, tassa nunami namminerimi ilaasunik timmisartuussinerit pisariillisarnissaat akikillisarnissaallu, tunngaviatigut suli tapersorsorneqartariaqartut, taamaattumillu siunnersuutini tunngaviatigut isummat maanna Naalakkersuisuusut mittarfiit tungaasigut misissuinerannut ilaatinneqartariaqartut.

#### Konto pingaarneq 72.20.10 Usinik assartuineq

2011-imi siunnersortit avataaneersut atorneqarnerisigut Royal Arctic Line-mi (RAL-imi) ukiumut pisariillisaanermut iluaqutissat 30 mio. kr.-nik nalillit nassaarineqarsimanerat Ataatsimiititaliap soqutiginaqisutut pingaaruteqartutullu isigaa. Pisariillisaanermut iluaqutissat atuutilersimangitsuuppata, RAL-ip akigititaasa ukiuni kingullerni qaaffaavigineqarnerusariaqarsimanerat naatsorsuutigineqarsinnaavoq, pissusiviusutigummi taamaangilaq. Misissuineq soorunami malitseqartinneqartariaqarpoq, Aningaasaqarnermummi ataatsimiititaliaq Naalakkersuisunut apeqqummini taama allappoq. Ataatsimulli isigalugu Nunatta Aningaasiviata unammilligassai pissutigalugit tamanna itigartikkuminaatsutut isikkoqarpoq, pilersuinermummi tunngassuteqartuni assingusuni pisortat ingerlatsiviutitsinni kisermaassiffiusuni angisuuni taamaaqataanik siunnersortinit *avataaneersunit* sukumiisumik misissuititsisoqartariaqarpoq, matumanilu immikkut Tele Greenland pineqarpoq, taannami malunnaqisumik ukiut tamaasa sinneqartooruteqartarpoq. Tamanna pisinnaavoq altaveqaaqatiginnikkut akikillisaanissaq siunertaralugu, aamma internetip nunap immikkoortuini tamani ingammillu ilinniartitaanermi siuarsarnissaa siunertaralugu ingerlatseqatigiffiup akissaajaatitigut sulisoqarnikkullu aaqjissuussinerata isornartorsiorpalaartumik nalilersorneratigut.

#### Suliassaqarfik 80-89 Sanaartornermut tunngasut

Ukiuni kingullerni pisortat sanaartugassatigut sinaakkutissaat, ukiut ataasiakkaarlugit suliassaqarfinni 80-89-miittut Aningaasanut inatsisini ataatsimut pisortat aningaasaliissutaatut paasineqartariaqartut, takussutissiami tulliuuttumi takuneqarsinnaapput:

Ukiuq aningaasaliiffiusoq <sup>1</sup>	Sanaatugassanut sinaakkutissat AI/AIS (mio. kr.)	Ilassutitut aningaasaliissutit IA-inatsimmiittut (mio. kr.)	Sanaartornermut sinaakkutissat AI+IA (mio. kr.)
AIS15-II	607,7	-	-
AIS15-I	679,0	-	-
AI14	778,9	131,4	910,3
AI13	779,4	-124,9 <sup>2</sup>	654,5

<sup>1</sup> Malugeqqusaq: Aningaasanut inatsit avaqqullugu pisortat aningaasalersuutigisinnaasai takussutissiami naatsorsuutigineqanngillat, assersuutigalugu aktiaatileqatigiiffinneersut.

AI12	946,4	78,2	1.024,6
AI11	937,4	174,0	1.111,4
AI 10	757,6	1,5	759,1

Takussutissiami qulaaniittumi pissutsit arlallit aallaaviusinnaapput:

- a. 2012-imili sanaartornermut sinaakkutissatut missingersuutiit *appariartuaartutut* pissuseqarput. Piffissamili tamatumani pisortanit aningaasaliissutit ataatsimut, isigalugu *qaffakkiartuaarsimapput*. Allatut oqaatigalugu pisortanit aningaasartuutit sulii amerliartuinnartut ataavartumik ingerlatsineranut aningaasartuutit atorneqartarput, annikinnerusumillu sanaartornermut aningaasalersuineranut atorneqartarlutik, sanaartornermummi aningaasalersuinerit eqqortumik aningaasalersuiffissaqartillugu inuiaqatigiit aningaasaqarnerannut ajunngitsumik *pilersitsisinnaapput*.
- b. Sanaartornermut sinaakkutissat ataatsimut isigalugit nikerartorujussuusimapput. Ukiumiit ukiumut nikeranerit 150 mio. kr.-t tungaanoortuusarput. Taama annertutigisumik nikeranerit sanaartornermik suliaqartunut arlaannaatigulluunniit iluaqutaagunangilaq, sanaartornermimmi suliaqartut sulisorisanik akuttunngitsumik soraarsitsisarlutillu sulilersitsisariaqartarput. Taamaalilluni sanaartornermik suliaqartuusut sulisuminnik aalajangersimasunik tatiginartunillu sulisoqarnissaminnut periarfissaat killilerneqartarpoq, taakkumi inaagaqarsinnaanermik pitsaassutsimillu qaffaseqisumik isumannaarinnissinnaapput, taamaaliornikkullu sannarlutat killilerneqarsinnaalutik.
- c. Ukiup aningaasaliiffiusup ingerlanerani sanaartornermut ataatsimut sinaakkusiaasut tulluanngivissumik amerlaqisut ilassutitut aningaasaliissutinit pisarput. Tamanna missingersuusiornermut atatillugu tulluartuusorinanginnerata saniatigut, aningaasanullu inatsisip Inatsisartut ataatsimut tulleriiaarineranut tunngavigisamut tulluartuunngimmat, tamannalu Aningaasaqarnermut ataatsimiititaliamut attuumassuteqarmat, taamatut missingersuusiornermi pissutsit naammaginangitsut soorlu qulaani imm. b-mi taaneqartutut ittut ersersinneqartarput.

Siuliani inerniliussaagallartut tunngavigalugit Aningaasaqarnermut ataatsimiititaliaq Naalakkersuisunik oqaloqateqassasoq Sanaartornermut ataatsimiititaliap kaammattussavaa. Nuna tamakkerlugu sanaartornissamut kissaatigisat pisariaqartullu annertoqisut imaaliillaannaq suussusersineqarsinnaapput, tamakkulu sanaartornermut kissaatigisat piviusunngortissinnaaneranunut ataatsimut isigalugu pisortanit sanaartornermut sinaakkutissat ukiumiit ukiumut allaqqussassaannngitsumik killiliisussaassapput, ingerlatsineranut aningaasaliissutinit minnerunngitsumillu tapiissutitut aningaasaliissutinit aningaasartuutit qaffakkiartornerat pissutigalugu.

<sup>2</sup> Nukissiorfinnut sanaartugassanut taarsigassarsjat 100 mio. kr.-nik ikilineqarsimanerat aningaasartaani immikkut takuneqarsinnaavoq, taakkulu isertitatut inissinneqarput. Aningaasat aktiaatileqatigiiffimmut nutaamut Nuummi Atlantikup ikaarneranut nutaamik umiarsualiviliornermut nuunneqarput.

Tamatuma saniatigut Sanaartornermut ataatsimiititaliap ilisimavaa, sanaartornermik suliaqartut aamma suliaqarfiit kattuffiisa pisortanit sanaartukkat pillugit ukiuni arlaqalersuni sinaakkutissanik aalajannerusunik kissaateqartarnerat, qulaanilu kisitsit taamatut isummersornernut tapersiineramik takutiisisutut isumaqarnartoq.

#### Konto pingaarneq 83.30.13 Nuna tamakkerlugu paaqqinniffiit

Kontomi pingaarnermi tassani nuna tamakkerlugu innarluutillit sungiusarterfiannik pilersitsinissamut ukiumut aningaasanut inatsimmut ukiunullu missingersuusiorfiusunut agguataarlugit katillugit 51,2 mio. kr.-t aningaasaliissutigineqassasut immikkut siunnersuutigineqarpoq (Suliassaq nr. 080.40.054).

Suliassamut allaaserisami takuneqarsinnaavoq suliffeqarfimmut tassunga ilaassasoq IPIS, sungiusaavik ikiuutilersuisarfillu. Takuneqarsinnaavortaaq suliffeqarfik Sisimiuniissasoq. Taamatut inissinnissaanut tunngaviusumut suliassaq pillugu ima allaaserisartaqarpoq: *“Aammattaaq sullissiveqarfiup Sisimiunut inissinneqarnissaa aalajangiunneqarsimavoq, aningaasaliissutit piginnaasanillu ineriartortitsinerup nuna tamakkerlugu siammarterneqarnissaat inuiaqatigiinnut iluaqutaasussatut isigineqarmat”.*

Pissutsit pisariaqartullu nalinginnaasut isiginiarlugit sanaartornermut pisortanit aningaasaliissutit nuna tamakkerlugu siaruaanneqartariaqarnerat Sanaartornermut ataatsimiititaliap tunngaviatigut isumaqatigaa. Taamaattorli nuna tamakkerlugu innarluutilinnik sullissiviup Sisimiuni inissinneqarnissaanik aalajangiineq imaaliialaannaq paasinanngilaq. Taamaalluni IPIS-ip Sisimiunut nuunnissaani suliassamut tamatuma akitsorsaataanissaa avaaqqunneqarsinnaanngilaq. Tamatuma saniatigut assingusumik nuussisarnerit misilittagaqarfiupput; sulisut amerlaqisut nutsernermut atatillugu sulliffimminit soraartarnerput, assersuutissaavorlu Nuka A/S-ip Nuummit Maniitsumut nuunneqarnera imaluunniit Polar Oil A/S-ip Maniitsumit Sisimiunut nuunneqarnera. Ingerlatsivinnut ajoqutaaqisumik annaasaqaataasumillu ilisimasanik annaasaqarneq annertoqisoq nutsernemi marluusuni pisimavoq, taakkulu atuisunit akileraartartuniillu matussuserneqartariaqarsimapput. Tamatuma saniatigut pissusissamisoorpasippoq innarluutilinnik sullissiviup Nuummi nuna tamakkerlugu napparsimmaviup qanittuani inissinneqarnissaa iluaqutaasasoq, immikkummi ilisimasallit, assersuutigalugu fysio-aamma ergoterapeutit, nakorsat immikkut ilinniarsimasut, tassaniinnissaat naatsorsuutigisariaqarmat – minnerunngitsumillu napparsimasut/sullitat, taakkumi pineqarnerat naatsorsuutigisariaqarmat.

Taamaattumik Sanaartornermut ataatsimiititaliap Aningaasaqarnermut ataatsimiititaliap kaammattussavaa, suliassap tamatuma inissinneqarneratalu sukumiilluinnartumik isiginiarnissaanut, inissiinerullu kingunerisaanik annertunerusumik akissaajaateqarnissamik kinguneqarnissaa, minnerunngitsumillu inissiinerup kingunerisaanik innarluutilinnut ajoqutaasinnaasut eqqarsaatigalugit. Oqaatigineqartutut pisortanit sanaartornermut aningaasalersuinerit nunami siammarterneqarnissaat Sanaartornermut ataatsimiititaliap tunngaviatigut tapersersorpaa, kisiannili innarluutilinnut ajoqutaanissaanik kinguneqassappat, imal. qitiusumik sulianut soorlu innarluutilinnik sanngiitsunillu ikiuinermut annertuumik ilisimasanik annaasaqarnermik kinguneqassagaluarpat taamaaliortoqartariaqarani.

Sanaartornermut aningaasalersuinerit nunami siammarnissaannik siunertaq attatiinnarneqassappat, Sanaartornermut ataatsimiititaliap taarsiullugu kaammattuutigissavaa ilinniartitaanermut, ilinniartut ineqarfiinut attaveqarnermilu suliniutinut aningaasaqarnikkut imminut akilersinnaasunut, soorlu aqquusiniliornernut, pisortat inissiaataasa oqorsaasersornerinut kiisalu imermik kissamillu uuttuutit atulersinneqarnissaannut, aningaasalersuisoqassasoq.

#### Konto pingaarneq 84.40.10 Kommunini atuariit

Sanaartornermut ataatsimiititaliap iluarisimaarlugu paasivaa, Aningaasaqarnermut ataatsimiititaliap aammaarluni kaammattuut nr. 3 pingaaruteqaqisoq uparuaateqarfigigaa, tassaasoq kommunit atuariisa illutaasa aserfallatsaalineqarnissaannut kaammattuut ukiumi kingullermi Aningaasaqarnermut ataatsimiititaliamit saqqummiunneqartoq. Qularutissaanngilaq ajornartorsiut pingaaruteqaqisoq Aningaasaqarnermut ataatsimiititaliamit uparuarneqarmat, pineqartummi suliarineqarneratut tulluannngilluinnarpoq kommunit aningaasaqarnikkut kaammattorneqartarmata, atuariilli illutaat aserfallatsiinnarlugit, kommuninimmi ataasiakkaanit immikkut isiginiassagaanni atuariit illutaasa aserfallannissaat akilersinnaanerusarmat, taamaaliornermimi pissusiviusutigut piffissanngortarpoq nutarterinerit annertuut nutaamilluunniit sanaartornerit Naalakkersuisunit akileneqarnissaat itigartinneqarsinnaajunnaartarami. Sanaartornermut ataatsimiititaliap ilisimavaa, sanaartornermut aningaasartuutit %-iisa ilaannik kommuninit akileneqartalernissaat isumaliutaanikuusooq, assersuutigalugu atuariup Namminersorlutik Oqartussat akiligaata ukiumi tulluuttuni illuutit nutaat aserfallatsaalinissaannut kommunit pisussaaffilerisigut. Qularnannngilluinnartumik tamanna suli isumatsialaavoq, kisiannili aaqqiissutissat allat aamma periarfissaapput, kaammattuinerullu tamatuma pingaarutillip piviusunngortinnissaanut Aningaasaqarnermut ataatsimiititaliap suliani nangissagaa kaammattuutigineqarpoq

#### Konto pingaarneq 84.40.16 Kultureqarnermut sanaartukkat

Sanaartugassanut Iluarsagassanullu Aningaasaateqarfimmi aningaasaliissutit piviusorsiorlumik tunngaveqarnissaannik isumannaarinissamut pisariaqartitsineq pillugu ukioq kingulleq Aningaasaqarnermut ataatsimiititaliap saqqummiussaa kaammattuut nr. 4 Aningaasaqarnermut ataatsimiititaliap uparuaatigeqqikkaa Sanaartornermut ataatsimiititaliap naammagisimaarlugu paasivaa. Sanaartugassanut Iluarsagassanullu Aningaasaateqarfimmi aningaasaliissutit suliniutinut aalajangersimasunut pituttugaapput, taamaattumillu aningaasat allanut imaluunniit suliniutinut allanut nuuinneqarsinnaanngillat, kisiannili pingaaruteqarpoq sanaartugassatut suliniutit Inatsisartunit aningaasaliiffigineqartut siusarnissaat pilersaarusiornissaallu, taamaalillutik aningaasaliissutit atorneqalissammata, sanaartornerlu ataavartumik ingerlanneqarluni, silamilu sanaartugassanut aputeqannginnera qerinannginnaralu pitsaanerpaamik atorluarneqarluni. Anguniagaq tamanna ullumimut anguneqarsimanngitsoq malunnarpoq. Taamaattumik Sanaartornermut ataatsimiititaliap kaammattuutip tamatuma attatiinnarnissaannik Aningaasaqarnermut ataatsimiititaliamut kaammattuuteqarpoq.

Naggasiullugu Sanaartornermut ataatsimiititaliap Aningaasaqarnermut ataatsimiititaliamut malugeqquaa, Sanaartugassanut Iluarsagassanullu Aningaasaateqarfik pillugu 2013-imut ukiumoortumik nassuiaammik suli tigusaqartoqarsimanngimmat. Tassunga atatillugu Aningaasaqarnermut ataatsimiititaliap kaammattorneqarpoq, Naalakkersuisut peqatigalugit Sanaartugassanut Iluarsagassanullu Aningaasaateqarfik mississorneqassasoq, suliniutit suli naléqquttuunersut imaluunniit atorunnaarsinneqassanersut misissorneqarnissaat

siunertaralugu. Tassunga atatillugu tigussaasumik nalilerneqassaaq, suliniutit kommunit  
aningsaasaleeqataanissaannik tunngaveqartut ilumut ingerlanneqarsinnaanersut.

Inussiarnersumik inuulluaqqusillunga



Anders Olsen

*Sanaartorneqmut ataatsimiititaliami siulittaasoq*